

Dithero tsa Tirelano mo Kutlwanong

02/2016/ Thero ka Sontaga wa 2 mo sebakeng sa Adfente, e le ka 06. 12. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go Luka 21:28, le re: "Mme e re tseo di simolola go dirafala, lo inamologe, lo tsholetse ditlhogo, ka gonne kgololo ya lona e a atamela."

1. Sefela sa 327 - 302/310

2. Thapelo: Morena, Modimo, re a kopa gore o re tshegofatse, o re phatsimisetse sefatlhego sa gago gore re pholosiwe ka ntlha ya ga Jesu Keresete. Amen.

3. Lefokto la Testamente e kgologolo le kwadilwe mo go Jes. 40:1-11;

Epistolo ka fa thulaganyong ya 6 e kwadilwe mo Tshenolong 3:7-13;

Efangele ka fa thulaganyong ya 1 e kwadilwe mo go Matheo 24:1-14.

4. A go ipolelwe tumelo ya bokeresete!

5. Sefela sa 44 - 42/44

6. Thapelo ya mmadi wa thero.

7. Epistolo ka fa thulaganyong ya 2 e kwadilwe mo go Jakobo 5:7-8, e re: "Jaanong he, ba ga etsho, nnang pelotelele, go tsamae Morena a tle. Bonang, molemi o a tle a lebelele leungo le le molemolemo la tshimo, a le pelotelele ka ntlha ya lone go tsamae le be le bone pula ya ntlha le ya morago. Le lona nnang pelotelele, lo tiise dipelo tsa lona, ka go tla ga Morena go le gaufi." Amen.

8. Thero: Phuthago e e rategang mo Moreneng wa rona Jesu Keresete, a bopelotlhomogi, le kagiso e e tswang mo Modimong Rara, le mo Moreneng Jesu Keresete di nne le lona! Pelotelele e fela ka ngongorego. Go itshoka ga se se se

botlhofo. Go bokete go itshoka le go nna pelotelele, fa re tshwenngwa ke ba bangwe, mme fa Modimo a re: Nnang pelotelele! O rata go dira sengwe mo go rona.

Go nna pelotelele le boitshoko, багаetsho, di na le motheo. Mo mafokong a a buang ka ga bopelotelele le boitshoko, nonofo ya go swetsa re e bona mo Moreneng. Tse di re tshwenyang di dintsi. Tse di re itumedisang di dintsi, mme kwa go ka diragalang teng gore re nne le tlalelo fela, re tshwanetse go nna pelotelele, le go itshoka. Tsotlhe tse di re tshwenyang, le fa e le eng, di re gopotsa, le go re supetsa gore Morena o bona tlalelo e re leng mo go yona. Ene o tla baakanya tsotlhe ka nako ya gagwe. Ee, lo nne pelotelele, go ya Morena a tla. Ee, go tla ga Morena go gaufi. A re itshokeng, re nne pelotelele, le nna ka nosi ke a itse gore go bokete go itshokela yo mongwe, fa a ntsenya monwane mo leisong. Mme ke tshwanetse go dira se se bolelwang ke Lefoko la Modimo, ke se dire se se buiwang ke pelo, maikaelelo a a maswe, gongwe ke Atame yo mogologolo wa me. Atame yo mogologolo o re tshwenya ka metlha, mme o tshwanetse go tompodiwa mo metsing a kolobetso ka metlha gore go tsoge motho yo mošwa. Mokwadi wa lokwalo go Bahebere a re: "Gonne boitshoko bo lo tshwanetse, e tle e re lo sena go dirafatsa thato ya Modimo, lo amogele se se solofeditsweng. Gonne o a tse: 'Go sa ntse go le sebakanyana se se khutshwanyane, mme yo o tshwanetseng go tla, o tla tla, a sa diege,'" Baheb. 10:36-37.

Ka moo yo o salang Jesu morago o a lemoga gore, fa a tsenwa ke mowa wa go nyatsa, le wa go ngongorega, le wa go sa itshoke, go a mo dira gore a se tshele sentle mo Moreneng. Mo go jona go batlega lorato lwa go nna pelotelele, le go itshokela tsotlhe, le go dumela tsotlhe, le go solofela tsotlhe, le go iphapaanya tsotlhe. Go nyatsa le go ngongorega ga go baakanye sepe. Mo boemong jwa go se baakanya, go a se senya. Boleo jwa go pateletsa yo mongwe, bo tsoseletsa jo bongwe mo go yo o patelediwang. Jaanong boleo bo na le mafelo a le mabedi, mo go yo o pateletsang, le mo go yo o patelediwang. Bopelotelele le boitshoko bo tla bo bo se yo mo go ka bobedi jwa bone. A re gopoleng gore Morena o pelotelele le rona, gonne ga a rate gore mongwe a latlhege, le e seng ope o sele, o a rata gore rotlhe re gorosiwe mo phologong. Morena wa rona o

ne a itshoka ka boitshoko jo bogolo, go tloga mo botsalong jwa gagwe go ya mo losong, e le loso lwa sefapaano. Ka ntlha ya maleo a rona o na a bediwa, a rwala serwalo sa mmitlwa, a sikara sefapaano, a kgwelwa mathe, mme a nna pelotelele, a dirafatsa thato ya ga Rraagwe yo o mo legodimong. A wena mo tlalelong ya gago ga o ka ke wa itshoka, le e seng go nna pelotelele? A le rona re ithute mo Mopholosing wa rona!

Morena o e tla, a re nneng pelotelele! A re itseng gore kilo e dira go tlabana, mme lorato lo tliša boitumelo le kagiso, gape lo fitlha maleo otlhe. Ee, go ntse jalo. Ga go na pelotelele, gongwe go itshokelana mo lefatsheng la rona, le mo go a mangwe ga go na go itshokelana? Tota ga bo yo, le e seng go rwadisanya merwalo ga go yo. Fela, "motho yo o bipang bolele jwa yo mongwe o batla thatano; mme yo o tsosang kgang gape o kgaoganya ditsala." Salomone o rialo mo go Diane 17:9. A re nneng pelotelele mo go yo montsho, gongwe mo go yo o khibidu, gonne go tla ga Morena go gauḡi. Ga re itse gore o tla tla leng. Rraetsho yo o mo legodimong o a itse. Gongwe bosigo, motshegare, phakela,, thapameng, mariga, selemo, rotlhe ga re itse. A re nneng pelotelele, re lete, re se tshwane le makgarebe a a neng a sa kgone go nna pelotelele, le e seng go leta. Ka moo Jakobo o a tiisa a re: Nnang pelotelele, bakaulengwe, go ya Morena a tla. Go nna pelotelele go na le maungo a a monate. Lefoko la thero ya kajeno le tshwantsha bopelotelele jo le jwa molemi yo o pelotelele, fa a lebelela leungo le le molemolemo la tshimo, a le pelotelele ka ntlha ya lone go tsamae le be le bone pula ya ntlha le ya morago. Kana ga a ka ke a dira sepe, pele a ise a bone pula. Go a batlega gore Morena a nese pula, a medise dijwalo. Maungo a a lebelelwa, gape maungo a tla nna teng ka nako ya ona a a tshwanetseng. Nna, le wena, a re nne pelotelele, gonne go tla ga Morena go gauḡi.

Boitshoko le bopelotelele

bo tiisa pelo, mme go ngongorega, mmogo le go nyatsa go tshikinya pelo. Motho yo o nyatsang o bokoa thata. Yo o pelotelele, yo o lebelelang Morena, motho yoo o na le thata, o tlhomame le mo tumelong. Go ngongorega, go galefa, le go nyatsa go tsoseletsa seretse, le tse dintsi, le tse di utlwisang pelo botlhoko. Motho yo o galefileng

ga a bone, le eseng go akanya sentle. Motho yo mo maketeng o tlhoka thata botlhale jwa legodimo jo bo tla dirang gore a dise pelo ya gagwe gore a se ka a tsenwa ke leswe le le mo lefatsheng. Re filwe gore re bee tsotlhe tse di re tshwenyang ka thapelo gore kagiso ya ga Jesu Keresete e buse dipelo tsa rona.

Nnang pelotelele, bakaulengwe, go ya Morena a tle, tiisang dipelo tsa lona, gonne go tla ga Morena go setse go atametse, go gaufi. Moruti yo mogolo yo o sa tlholeng a le teng, e bong Isashar Dube o kile a bua a re: Motho o tshwanetse go ithuta tse tharo mo botshelong jwa gagwe. Ke tse:

Sa ntlha ke go nna pelotelele.

Sa bobedi ke go - nna pe-lo-te-le-le.

Sa boraro ke go - nna pe - - - lo - - - te - - - le - - - le Go ntse jalo fa gare ga batho mo botshelong jwa bone, fa ba rwesanya merwalo ka go utlwisana botlhoko.

Bogolo bopelotelele bo bidiwa mo go rona bakeresete, fa re raelwa ke dipelaelo tse di tthagang ka ntlha ya tumelo ya rona ka ntlha ya bone ba ba reng: Morena ga a ise a bowe ka dikete tse pedi tsa dinyaga. Ga a tlhole a bowa ka fa go builweng ka teng mo Lefokong la Modimo. A re nneng pelotelele. Morena o solofeditse gore o tla bowa go athola batshedi le baswi. O tla dirafatsa tsholofetso ya gagwe. Le Jakobo o a tiisa, a re: Go tla ga Morena go gaufi! O tla bowa ka nako e e tlhomilweng ke Rraagwe. Amen

9. Thapelo: Morena, re a go leboga, ka o re rutile ka morafe wa gago wa kgolagano e kgologolo go lebelela ditsholofetso tsa Testamente e kgologolo dikete tsa dinyaga, go ya di dirafaditswe ka go tla ga Mesia ka botsalo jwa ga Morwao kwa Betlehema. O re rute gore rona badumedi ba kgolagano e ntšhwa re lebelele go bowa ga Morwao gore a tle go athola batshedi le baswi ka bopelotelele jo bo tshwanetseng. O re thuse gore re se lape mo tebelelong ya rona, mme re nne pelotelele, re nne re mo lebelele ka go ipaakanyetsa go bowa ga gagwe gore re fitlhelwe re ipaakantse mo tumelong e e siameng, fa a tla bonala ka letsatsi la bofelo, re nne re ikanye gore re tla amogelwa ke ene ka ntlha ya go itshwarelwa maleo mo leineng la gagwe. Mo tumelong eo o re thuse

gore re nne pelotelele, re rwadisanye merwalo ka lorato, re itshokelane, re supe bopelotelele jwa rona ka go fitlha maleo a ba bangwe ka lorato lo lo bipang bontsi jwa maleo. Re kopa jalo mo leineng la Jesu Keresete, Morepholosi. Amen. Thapelo ya Morena: Rara wa rona yo o mo legodimong ...

10. Sefela sa 46 - 44/46

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. Mkhabela , ka ngwaga wa 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.